

大

觀

錄

大觀錄宋名賢法書卷七目錄

吳傅朋游絲書王荊公詩卷

洪舜俞道場詩卷

趙子固詩帖卷

文信國詩簡卷

草書謝敬齋坐右辭卷

曾空青草履帖

王待制欽止帖

王逸老杜門帖

米侍郎至性帖

葉少保季高帖

汪龍圖太虛帖

蘇後湖二札

李文定被詔帖

胡文定奉問帖

趙忠簡辭郡帖

張忠獻遠辱帖

呂忠穆台眷帖

韓蘄王總領帖
運使帖

沈忠敏高秋帖

翟參政宣撫帖

陳參知水仙帖

張章簡授封帖

張文忠宮祠帖

洪文安睽遠帖

朱鴻臚別後帖

葉丞相初冬帖

汪尚書子東帖

張學士關徹帖

吳信州札

敘慰帖

誨翰帖

戒牛帖

眷聚帖

虞忠肅適造帖

張直閣起舞帖

殊祉帖

宮使帖

范文穆垂誨帖

荔酥帖

陸待制仲躬帖

奏記帖

范潔一舟帖

春澤帖

王參知薄寒帖

康伯可宮使帖

王丞相上恩帖

朱文公賜書帖

教授帖

韓尚書晴寒帖

楊文節清和帖

王忠文寵示帖

徐祕閣安國帖

謝中丞傾耳帖

蔣待制冲寂觀詩帖

喬文惠恐勤帖

杜子卿勸顧帖

樓宣獻雨潤帖

曾開府再拜帖

龍觀察歲華帖

吳少師觀李氏譜牒帖 焦山題名帖 壽父帖

觀使帖

杜清獻判院帖

魏文靖注釋帖
陸左相羣玉帖

大觀錄宋名賢法書卷七

吳郡吳升子敏彙輯

吳傳朋游絲書王荊公詩卷

說字傳朋錢唐人游絲書細如髮硬如鐵時稱獨詣
白宋紙本高九寸長九尺凡三接第一紙宋印七方
又吳說私印一方第二紙收藏宋印三方下三吳吳
說章一方第三紙收藏宋印四方又延陵君子後裔
說章一方游絲書荊公題西太乙宮壁樓計詩十五
行行書東萊贈傳朋長歌二十五行末作楷跋七行
傳朋在南渡初以書名爲思陵眷異行體直逼虞永
興娟秀大雅正書出入楊羲和內景經翩翩有逸致
游絲則傳朋自瓶一格大約變中郎飛白法如晴絲
游空全以筆尖運化擅此藝者傳朋之後無聞焉荆

大觀錄卷七

二怡寄軒

公詩前一首集中失刊想刪逸耳

秋早川原淨麗雨餘風日清酣從此畊歸劍外何人送我
池南

柳葉鳴蜩綠暗荷花落日紅酣三十六陂春水白頭想見
江南

艸際芙蕖零落水邊楊柳欹斜日暮炊烟孤起不知魚網
誰家

上饒使君郎中游絲書歌

君不見往時文學顧八分中郎之後典刑存又不見先朝
文會書堆墨寶殿濃雲照南北未似只今上饒守靜寫游
絲不停手非烟非雲斷復續緩步徐行不拘束斷崖一落
千丈滑遠望筆行如一髮鬼神竭力覩不見鐵礦消亡鋼
作線線舞飛揚不自由縱橫自在勝銀鉤知君此意非安

排妙處不從筆下來心凝神釋萬事去信手却立無纖埃
滿堂回頭莫見猜我自悟此忘胷懷操舟相馬在事外頑
民識此由心齋如君下筆少有意錦繡寧不誤翦裁君惟
無心故若此秋毫自足纏風雷鍾王斂手謝不敏長史懷
素慚衰頹病夫一見心眼開向來窮愁安在哉直學士院
紫微舍人東萊呂公爲說作此詩後二十許日公捐館舍
此殆其絕筆也公之句如盤中走丸如地中行水雜之少
陵詩編中未易議優劣也其季偉信見屬寫本因題其後
紹興十五年歲在乙丑十月旣望錢唐吳說

洪舜俞道場詩卷

公名咨夔字舜俞於潛人嘉定二年進士通判成都
毀鄧艾祠更祠諸葛亮告其民曰母事仇讎而忘父
母還朝應詔陳言其父見其疏曰吾能喫茄子飯汝
無憂旋以論李全爲臺諫交章鑄二秩讀書故山七
年史彌遠死召拜監察御史公感激知遇讜言危論
皆切政本擢歷刑部尚書翰林學士知制誥力求去
位加端明殿學士卒御筆有鯁亮忠愍之褒其遺文
兩漢詔令摹抄春秋說外內制奏議行世此卷牙色
花紋紙本行書寸計大詩一札一首有柯九思沈石
田項墨林藏印

何山如幽人道場如大家穰穰衲子脚刺刺騷翁牙挾雋
控寒飈披光躡晨霞危顛矯窄堵平疇略汚邪巖泉跑虎

湧徑松髯龍拏鐘梵破深寂金碧開芬葩修廊步履峻傑
閣望眼賒山勢珮玦轟湖光鏡奩舒清節香靄入古弁空
濛遮列翠不可唾羣籟無敢譁坐我梅檀林酌之鎗旗茶
宇定岫出雲語妙天雨花吾生久墮甌昔游慣乘槎夷猶
廬阜陽宿留岷江涯高曾留嶠棧卑或搜崖窪舊夢難歷
省此行足雄誇老親八十健閒儔二三佳拍浮一葉眇收
覽萬景奢富貴上蔡犬貧賤東陵瓜未須笑落鐸誰能苦
簪沙侯門占噪鵲旋撓趁歸鴉奇事恐沒沒舉詩屬僧伽
端平甲午秋九月庚申追記壬辰小雪前奉親游道場詩
書以遺住山舟老古潛洪咨夔舜俞

龔

咨夔別後無日不病抱病應酬病愈甚猿鶴入夢屢矣手
帖來前雲氣猶溼恍然分半席梅檀林之下慰浣可量舊
詩入石呈醜爲多跋語非所敢當承朝家願移瓶錫于茂

苑隨處結緣有何不可而力辭近時衲子謀窠坐與干差
遣同安知青菜根通天下只一般滋味靜退高風可勝欽
仰盤陀花竹無恙大衆安隱六月八日咨夔皇恐上記
舟公堂頭禪師 佳茗多感香杏仁一包試參之咨夔

法舟昨枉國史中書直院判部侍郎頃載登山佳什敬
雪手圭復誠負暗投之愧竊謂蘇文忠公昔游有詩以
贈莘老學士壽之堅珉山倚詩重法舟蕞爾寒緇茲亦
何幸獲此寵遺得與雲鬢爭翠謹礮石山中作雲峯蘇
洪帖雲端平乙未維夏住山傳法法舟書

平齋先生洪公宋南渡後大手筆也孟頫弱冠已愛讀
公文集恨生晚不得拜下風先生五世孫爲僧於天目
師子寺名智俊過溪上出此示僕三復之餘旣歎詩律
之深及觀所與安撫書又見公於國事用心如此撫卷

起敬輒書其後孟頫

天目洪忠文公游道場何山詩與眉山蘇文忠諸作先後相映真若所謂山倚詩重者矣忠文此詩當時已摹勒石自端平甲午迄今已一百二十二年而真蹟宛然猶在誠可寶也至正十五年乙未五月十日金華黃潛觀於中天竺因書其後以識歲月

右侍郎洪公奉其親少師公游道場何山遺住山舟公別浦禪師詩也今歸之郡中常上人常往年侍其師竺遠源禪師住吳山時見其六世孫大拙用公以是遺墨獻於禪師常因珍襲而寶愛之茲來歸源蘭若焚香敬觀惜不得見所與安撫書耳然山中舊石刻荐更兵燹不復存矣故翰林承旨趙公學士黃公跋語在前惟善何敢著筆輒綴數語於後以識俯仰今昔文物陵替山

林彫謝無復舊觀之感慨云至正二十六年歲在丙午
佛誕日曲江居士錢惟善謹書

洪忠文詩謂道場何山爲大家幽人此蓋發坡翁之遺
蘊譬如二人寫真文忠已極其神觀意度矣而忠文乃
直指自出其姓名與字是可貴也詩法一本韓與舟老
書尤見前輩激昂意思己酉十月九日義興馬治楓涇
涇寓舍題

趙子固詩帖卷

深牙色綿紙本高一尺長一丈八尺凡六接紙素之
精墨采之潤硯石之古玉簪筆號之佳臨池諸具無
美不備加以絕妙好詞淋漓揮灑結體約一寸五六
分計八十一行出神入化宋末法書中希有蹟也後
有趙蘭室蘇昌齡諸詩跋又一詩無款紀年宣德疑
夏尚書元吉筆但詩中改蘭室名孟葆爲孟荐初意
誤欲押韻耳及觀跋語亦稱孟荐豈別有考耶疑者
闕焉俟博雅訂正

送上馬嬌圖與賈秋壑

錦韉金絨玉蹀躞天寶繁侈逾大業華清浴罷燕沈香弓
箭才人擁旌節前頭樂部紫雲迴催駕顚迎奏三疊阿瞞
駐轡立多時欲上花嬌尙嬌怯步步將隨那肯離曾聞願

作連理枝燕安儻及思艱危那有馬嵬攀訣時漢家山河
安四維披香千秋維弋綈龍眠晝茲非街奇端與曹高白
孟陳元龜

鼠歎

落落兩鼠入伏箱室穴已計逃無方擁狸追捕冀一快顧
視窮搏成徊徨先登鑿矛隸弗力第諉狸也才非良我觀
感憤成歎慨陰邪自古能干陽陰邪豈果能干陽否泰還
知屬主張元和御史勇論諫一衤闌豎無精光卻從低回
取相位繞指由來百鍊鋼

牆頭花

牆頭花紅且白一百五日過寒食寒食過了好風日風又
吹日又炙滿枝好花盡狼藉愚者見花不知惜我輩見花
常唧唧有酒莫停杯當歌莫停拍頭上絲絲霜雪來老大

見花空歎息

繁昌官舍竹

南牆牆下梅邊竹今歲竹根始入來雙筍並生成幹立一梢斜娜對窗開知吾欲畫如呈樣問汝無言只舉杯此去更應多長旺後人端合事栽培

借補之梅於君謨弟

知是珍藏難假借其如愛學啓思惟暫時爲我開心法他日偕君作畫師曩習凌波偷筆格亦曾面壁隔年期從今軸上成雙美不恨此梅無好枝

寶祐甲寅十一月廿八日午睡起忽有持此紙來者因爲書舊詩數首用吳昇玉簪筆唐端石執硯自好漫耳觀者未知爲如何也三十年臨池所得僅爾益信翰墨非易事天與分數限量更欲有加不可它時或更進視此當一笑

或流落箱笥間爲吾愛存之無忽彝齋居士趙孟堅子固

記

一

一

至治壬戌之秋九月旣望四明東發後人黃正孫敬觀
夫書字乃昔史籀及秦蒼頡始定則未定之前未成字
其可知矣嘗觀尚書之序日得古人所藏古文虞夏商
周之書及傳論語孝經皆科斗文字又升孔堂聞金石
絲竹之音乃不壞宅悉以書還孔氏科斗書廢已久時
人無能知者以所聞伏生之書考論文義定其可知者
爲隸古定於是知真正之字古昔以來未之有先有篆
而後有隸篆隸之後始有真字至晉右軍王羲之結字
有法圓拆合度曾無後世暢然忘返放縱跌宕雖獻之
已有蛇蚓之譏矣况其他耶如張華王敦王導等帖乃
知唐人臨筆而然若晉人雅韻不如是爲後學開此眼

者黃長睿陳簡齋姜堯章諸君是也余自幼學舉業之暇嘗閱歐帖先君惡其方拙俾習二王書吾鄉吾族少有能書者於是親炙蘭坡子固兄之字此兄不惟長於文章亦精於字學若怒猊抉石渴驥奔泉予雖習寫亦未免乎有春蚓秋蛇之譏焉一日訪蘭坡兄承出示此紙謂邇者因暇而書且曰吾家好學者少蘭室弟可以著語否孟葆自揣其生也晚其學也晚拙札特春蚓秋蛇何敢與龍蛇並旣珍愛寶翰又不容辭者也時丙辰上元後三日弟蘭室趙葆茂叔謹書

蘭

室

前朝諸王孫風流富文彩遺蹟滿江湖寶惜依然在子固老詩仙雄才抱磊塊赤心願中興微言忤時宰栖遲遂初志浮湛了無悔游戲精翰墨竟爲世所採題詩拜後塵相望二百載後學蘇大年拜題

蘇

復觀彝齋蘭坡趙子固所書上馬嬌圖與賈秋壑并題
補之梅官舍竹牆頭花詩若干首且筆力奇古愛之不
能去手後乃弟蘭室趙孟苻跋注諸家法書甚美見其
雲根碧澗圖書有真道二字獨懸方知乃沈紫玄先生
號也想必有詩磨去矣予嘗見先生有雲根小草詩集
多有傑句清新剛烈挺異驚人肺腑切切於心今竟不
獲睹耳故用述此少追諸先覺之良譽者耶予老鄙言
荒誕弗工聊寫於卷末以塞其意云贅以歌曰

嘗慕雲根集小草良標貴格今何討數觀雷平竹隱圖
獨占銀潢霽秋掃彝齋翰墨驚江湖謂之箱笥存□烏
人中老龍知何許至俾真道懸圖書我歌帳望情曷已
若得驪珠萬斛喜補之梅壓牆頭花王孫爲愛書好紙
馬嬌□上顏猶良臨風忍別汗衣裳形容徒爲千古說

一踐塵垓何渺茫偉哉古人真可羨詳觀書法良多辨
魏公適逝更伊爲繼踵翰華維孟荐胡爲奪得此中奇
龍蛇科斗真魁爲寥寥百世遺風在安能謂我塵後隨
宣德壬子歲中秋

文信國詩簡卷

公名天祥字宋瑞又字履善吉水人年二十舉進士
集英對策理宗親擢第一德祐祚移公往來兵間請
和不就被執得脫奉兩孱王崎嶇嶺海冀奮一旅兵
敗身執留燕數年元祖百計馴之終不能屈成仁取
義年四十七此卷白紙本草書指頂大韶秀中具勁
逸之氣時戎馬流離臨池暇豫若平居無事可敬也
收柳女信痛割腸胃人誰無妻兒骨肉之情但今日事到
這裏於義當死乃是命也奈何奈何途中有三詩今錄至
言至於此淚下如雨

邳州哭母小祥九月十日

我有母聖善鸞飛星一周去年哭海上今年哭邳州遙想
仲季間木主布筵几我躬已不閱祀事付支子使我早淪

大觀錄卷七

九一怡寄軒

落如此終天何及今畢親喪於分亦已多母嘗教我忠我不違母志及泉會相見鬼神共歡喜

過淮

北征垂半年依依只南土今晨渡淮河始覺非故宇故鄉已無家三年一羈旅龍朔在何方乃我妻子所昔也無奈何忽已置念慮今行日云近使我淚如雨我爲綱常謀有身不得顧妻兮莫望夫子兮莫望父天長與地久此恨極千古來生業緣在骨肉當如故

亂離歌六首

有妻有妻出糟糠自少結髮不下堂亂離中道逢虎狼鳳飛翩翩失其凰將雛二三去何方何虞國破家又亡不忍舍君羅襦裳天長地久遠茫茫牛女夜夜遙相望嗚呼一歌兮歌正長悲風北來起彷徨

有妹有妹家流離良人去後攜諸兒北風吹沙塞草萋窮
猿慘澹將安歸去年哭母南海湄三男一女同歔歎惟汝
不在割我肌汝家零落母不知母知豈有瞑目時嗚呼再
歌兮歌恐悲脊鴿在原我何爲

有女有女婉清揚大者帖學臨鍾王小者讀字聲琅琅朔
風吹衣白日黃一雙素璧委道傍鴈兒鴈兒秋無梁隨母
北去誰人將嗚呼三歌兮歌愈傷非爲兒女哭淋浪

有子有子風骨殊釋氏抱送徐卿雛四月八日摩尼珠榴
花犀錢落繡繡蘭湯百沸香似酥歛隨飛藿飄泥塗汝兄
十三騎鯨魚汝今三歲知在無嗚呼四歌兮歌以吁鐙前
老影月明孤

有妾有妾今何如大者手將玉蟾蜍次者親抱汗血駒晨
妝靚服臨西湖英英雁蕩飄璚琚風花飛墜鳥嗚呼金莖

沆瀣浮汙渠天摧地裂龍虎徂美人塵土何代無嗚呼五
歌兮歌鬱紆爲爾迎風立斯須

我生我生何不辰孤根不識桃李春天寒日短空愁人北
風吹隨鐵馬塵初憐骨肉鍾奇禍如今骨肉更憐我汝在
空能嬰我懷我死誰當收我骸人生百年何醜好黃梁得
喪俱草草嗚呼六歌兮勿復道出門一笑天地老

一讀此三詩便見老兄悲痛真切之情事至於此爲之奈
何凡事只待千二哥至造物自有安排

一可將此詩呈嫂氏歸之天命仍語靚妝璫英不曾周旋
得毋怨毋怨徐爚以下皆可道達吾此意當此天翻地亂
人人流落天數奈何奈何

一可令柳女環女好做人爹爹管不得淚下哽咽哽咽
一此詩本仍可納諸千二哥兄天祥家書達百五賢妹

右以上詩八首宋丞相文信公之所作也公諱天祥字履善廬陵人穆陵之丙辰狀元也遭宋末造間關萬死卒以自獻使後聖有作安知不與三仁並稱淮陰龔開嘗錄公大概而議其不當出使然公豈不知自惜遣它官祈請特當是時國亡在只尺苟可以存社稷保斯民雖死亦不暇顧又烏計尋常瑣瑣禮儀哉八詩雖皆載公指南錄千載之下讀之輒使人流涕不休則其增夫三綱五常之重然後知詩之有裨益於世教者多矣淮南劉安於楚辭有曰推此志也雖與日月爭光可也嗚呼豈特楚辭哉至順四年四月戊寅京口陳方拜書右文信公遺墨前參知政事本齋王公所藏公歿已久家人理筐篋書尺叢積顧是紙損爛將裂以拭卮匱公之子季境適至識爲信公書咄嗟驚異亟命裝池以完

嗚呼豈非有神物守護之歟不然英靈之氣不泯而致之歟是詩之作念國家之覆敗痛骨肉之離絕其情切其辭哀使人至不忍讀然其竭孤忠於所事付一死於素定其志決其氣壯聞者爲之興起可謂仁至而義盡矣先賢尺牘人尙皆藏棄之矧信公之精忠偉烈震耀古今翰墨光芒垂示臣子者乎不惟王氏寶之百世而下固夫人之所同寶也史官河東張翥書

公旣變姓名詭蹤跡間關萬死然後由揚子江入蘇州洋展轉四明天台以至於永嘉其瀕於死者一日夕之間不知其幾也方是時公於一死旣以素定故能於一話一言之際縱衡顛倒不失所謂忠與義嗚呼宋有天下幾四百祀其亡也伏節死義者多矣然皆不若公更萬死而不少屈至竟而後歸於一死妻妾子女在所鍾

情故其辭爲尤痛云遂昌鄭元祐拜書

文信公當國朝至元戊寅歲厓山事潰被拘北行此卷諸詩卽是歲道中所作後五年爲至元壬午遂執節以死嗚呼自古人臣遭國家喪亡能秉志不遷從容就義爲天下後世所嚮屬未有盛於公者也觀此諸詩則知公之所以處生死之際者可謂審矣嗚呼百世之下讀其詩而不爲之感激流涕者尙爲有人心也哉至正十年歲在庚寅五月甲子布衣金華王禕敬書

語有之嘻笑之忿甚於裂眚長歌之哀過於慟哭文信公之忠肝義膽炳白當世正不在柴市慷慨就死之日實在夫弟妹輸寫無聊之時其衷抱精神死別痛苦固天壤之大不幸而爲古今無敵之盛名要不待後之人極口贊說予嘗怪戰國之士若侯嬴田光輩自負奇節

卒不過以一死爲人長技噫市井小夫感恩酬利之際區區所謂泰山之重鴻毛之輕殆無足言者以信公之慷慨於弟妹子女下至婢妾從容慰藉於垂死之際顧若辭禍而不可得者然後真能以義處死蓋蹈義難蹈白刃非難人獨鮮能知耳吳下陳謙謹書

余每讀公指南錄至其爲母夫人小祥并懷弟妹妻妾子女諸詩未嘗不爲流涕太息也今於王君季境家獲觀公所作諸詩真蹟忠義之氣藹然於紙墨之間直與日月爭光予雖從浮圖學槁木死灰之人亦不能不爲感動使章甫縫掖有國有家覽之當何如哉當何如哉洪武十三年秋七月吳郡沙門道衍

皇明正統甲子歲海虞吳訥識文長未錄

文信公之死偉矣其危急流離之際亦惟其能以詩發

之故信公之有詩如屈原之有騷皆善鳴其死者也錢公世恆以家藏三詩示余蓋出公親書以寄其妹氏此又原之女類也乎其詩今載指南錄中而此則系以與其妻妾子女決絕之言嗚呼淚下如雨讀者猶然而西臺慟哭如公門下客者未必其涕之無從也吳寬

文丞相草書謝敬齋坐右辭卷

牙色紙本高一尺有咫長九尺二寸計三接草書敬齋辭三百八十一字信國跋二百八十二字辭字結體頗大四十四行跋字差小二十七行共七十一行信國精忠大節以一身任有宋三百祀綱常之重臨池小道耳無足爲公軒輊然世之寶公翰墨者比於唐之顏平原蓋兩公書不必同其忠節同也此卷爲敬齋書且疏通其義者有關友道匪淺顧公書在咸淳癸酉已當滄海橫流真州阮谷忍死間關敬齋不避艱險周旋患難其於此辭可謂苟息不食言矣惟考敬齋在孝宗朝雖任尚書無文章事業可以表見得此詞公爲之書且跋遂託不朽云

周公謂魯公曰君子不弛其親不使大臣怨乎不以故舊

無大故則不棄也孔子曰君子篤於親則民興於仁故舊不遺則民不偷周公傳國孔子立言懇懇於親戚故舊者皆所以厚風俗善教化也世遠人亡經殘教弛漢蘇章爲刺史行部有故人爲清河太守設酒饌陳平生之好甚歡乃曰今日故人飲酒私恩也明日刺史案事公法也不知太守謂誰厥罪惟何觀其一天二天之說是必巧言令色之鮮仁而非直諒多聞之三益也然旣與之有平生故舊適然相逢亦當忠告善道委曲勸免使之悔過遷善或使之自作進退何乃待之以杯酒加之以刑責蓋賣友買直釣名干進爾而論章者多亦不復用然則何益哉世變愈下人心愈非至唐韓子則數有反眼下石爲禽獸之所不爲者宋蘇子則謂爭半年磨勘雖殺人亦爲之者觀韓蘇之言則蘇章杯酒懇歡之歡亦無之矣周孔垂訓必歸之

成德君子有旨哉

右敬齋謝先生坐右自警之辭人之所以爲人者以有人倫也朋友居人倫之一其視君臣父子兄弟夫婦雖其情禮有隆殺而義之所起皆天性之不能自己者惟其出於天性是以均爲人道之大端親者無失其爲親故者無失其爲故各盡其分所以爲人也自漢蘇章有刺史故人私恩公法之語世以爲固然而莫知其非傳爲故實流俗雷同千餘年於此先生本之人心按之經義用春秋誅心之法以賣友買直釣名干進以發其微於是知章之不可干以私乃自私之尤者也正使當時繇是而爲公爲卿外物之得曾何足以救本心之失況不必得乎語曰觀過斯知仁矣先儒謂君子過於厚小人過於薄章不足云也先生之論足以樹大倫敦薄夫拯來學之滔滔而歸之正先生

真仁人哉咸淳癸酉六月吉日後學文天祥書

司徒教倫朋友居一天典民彝萬世不易參諸宵雅伐木之詩朋友故舊合而言之忠厚俗成國脈以壽友誼既薄於國何有蘇章于禁以及源懷賣友取名忠焉在哉昔唐子西著論正友敬齋述之矯薄歸厚文山健筆立懦廉頑扶植名教盍夫汗顏我與二公皆同朝舊人亡書存悲懷孔疚浚儀王應麟題

伐木宵雅之一詩也朋友廢缺序詩書重爲世道歎其所繫豈小哉敬齋先生制漢刺史私恩公法之辨殆有感而發文山先生爲之書又從而申其說皆所以敦友道扶世教也攷所題歲月在咸淳癸酉明年時事非矣文公身爲楚囚手作顏帖且不肯失口它人謝公俱流落天涯不避形跡不顧禍福慨然周之無難色可以愧

世之賣友者矣文公於君臣之分謝公於朋友之義蓋兩盡之嗚呼民彝之不與世變俱泯者豈非斯文之力哉二帖宜爲謝氏子孫寶上章困敦嘉平旣望荆溪蔣

岵謹書

卷四

卷四

右宋敬齋謝先生嘗論漢刺史蘇章私恩公法之語以爲賣友干進置坐右以自警丞相信國文公爲之書復申其義以爲使章繇是而得公得卿外物之得不足以救其本心之失況不必得乎嗟夫風漓俗偷友道淪喪世之刻薄而傷倫害義者往往舉章以藉口而侈然自以爲得使其見二公之論寧不大愧於心乎此其扶世教拯頽風敦薄俗爲不少矣余不及見敬齋識其遠孫孟本其爲人忠信其於故舊甚厚真能守其家訓矣使其爲章寧不鄙其所爲乎孟本間出以示余謹書而歸

之時宣德二年歲次丁未夏四月既望豫章萬輶輝跋
右有宋尚書敬齋謝先生坐右自警辭一通凡三百一
十五字丞相文文山先生手書之其後二百八十二字
乃文山所跋語也辭翰兼美觀者貴之是爲敬齋裔孫
姑蘇孟本先生家藏舊物先生能世濟厥美旅寓貴州
折輦行與余交者也間從余索題予視其左方古今諸
名公贊翼之辭旣詳且盡珠聯玉綴矣予吻安置哉猶
勉爲之而二公高風大節固非末學所能輕重也然先
生意雅厚可虛辱乎謹案敬齋所著漢蘇章賣友釣名
之論出於千百年之獨斷誠有功於人倫非文山表而
出之其湮沒不能暴白於世也決矣是則文山之有功
於敬齋者又爲何如哉使死者無知則已苟或有知聞
二公之論其顯不泚焉吾不信也或曰昔唐之張鎮周

事亦相類而議者不知貶何耶曰事固有似同而實異者也夫鎮周盡歡於故人雖同其所以明致其告戒之辭使其無撓於法則孺文初未嘗及之此其所異也惡得概貶歟抑考之文山書此時當度宗咸淳癸酉迄今殆百有五十餘年而墨蹟宛然其間桑田滄海者不知其幾矣况區區之斷簡乎是雖繇子孫之賢能寶之要亦有神物護持用存世戒也爲先生後者尙益謹之哉時大明宣德四年歲在己酉秋八月中秋前二日順昌廖駒致遠謹書

曾空青草履帖

紆字公卷號空青名在黨籍考宋史無傳此帖白紙
高九寸八分闊一尺三寸餘行草八行

紆以道半兩淖狼狽之甚欲煩左右置草履以濟兵卒漫
叩一公文去幸留今晚恐不可行來日相見紆再拜
久直知縣七哥 借一二十人來相接左言

王待制欽止帖

份官任待制名隸黨籍此帖白粉箋高八寸闊一尺
餘行書計八行筆精墨燥紙質甚美

份頓首啓比辰薄寒伏惟尊履蒙福自抵輦轂日因多事
既已眎職復未獲遂趨謁第有瞻馳之勤旦晏當卜祗詣
姑奉狀起居不宣份再拜上

欽止司勳賢友執事

王逸老杜門帖

升字逸老號羔羊居士草書爲內廷稱賞此札黃紙
本高八寸七分闊一尺三寸餘行草十三行

升再拜衰老杜門久病不承興居之間日益系詠近魏端
升見臨能道動止之詳用以爲慰累蒙見許一過敝園竟
不聞足音因書切幸迂臨至叩升再拜

米侍郎至性帖

公名友仁小字虎兒官至兵部侍郎嗜古善書山谷嘗戲之云虎兒筆力能扛鼎教字元暉繼阿章識者謂宋之有元章元暉猶晉之有羲獻云此尺牘徑幅心畫妙處尤具劍拔弩張之勢

友仁惶恐頓首再拜宗丞學士至性坐右卽日伏惟節抑順變序之遷動止持福不勝馳情之深自承廬國封塋次旣未經百日義不敢遣人上問忽承來過張羅之巷復奉手况具審卽日遠在郊外友仁例不講人事無由詣見伏紙第深思跂而已謹奉手啓上復不宣友仁惶恐再拜宗丞學士至性坐右

葉少保季高帖

公名夢得字少蘊吳縣人紹聖四年登進士第徽宗朝累遷翰林學士知汝州帥隸昌忤宦官廢高宗駐蹕揚州除戶部尚書陳待敵之計置制諸路漕饋軍興不乏俾諸將得悉力以戰公之功也拜崇信軍節度使致仕十八年卒贈少保此札黃紙本高九寸闊一尺三寸行書計十行

夢得再拜上啓閣下偉業宏才先帝所識擢誠心一德主上所注意雖勤勞庶務功成不有欲自委之以去而天下固皆執而不捨今茲再踐政闡公望益隆恭惟道與時行展盡底蘊策勳廟社何有窮已竊惟順御時和永膺難老之福以副具瞻下誠扣扣夢得再拜上啓

汪龍圖太虛帖

公名藻字彥章饒州人中進士第時胡伸亦以文名人爲之語云江左二寶胡伸汪藻除編修忤王黼投間八年欽宗召還累遷翰林學士以所御白團扇書紫誥仍兼綰黃麻似六經句賜之屬時多事詔令多出其手紹興中進龍圖閣學士尋奪職卒此札紙本高一尺闊一尺三寸行書十一行

藻咨目頓首再拜上啓太虛判院朝議台坐違別滋久瞻仰殊深忽辱貽教從審卽日秋杪氣肅神明攸相台候動止萬福且感且尉正擬參覲敢覲精調茵鼎前膺殊渥謹奉狀布復不宣藻咨目頓首再拜上啓
太虛判院朝議台坐

蘇後湖二札

庠字養直後湖其號也隱居丹徒不應鄉舉嘗以清江曲印證坡公公亟爲延譽晚年辟召至五堅臥不起其高素如此二札紙本上問札小楷書七行伏候札行草七行尚有紹興乾道諸宋跋合爲一冊

上問札

庠再拜上問尊夫人共惟壽體益康寧門中上下均休老媳婦輩敢拜起居山中有委萬萬疏示庠再拜

伏候札

門中伏候萬福妻子輒拜起居之禮必恭已行否或面留告道區區之意山中雖荒索然歸金壇亦便道也儻蒙肯賜屈辱不勝至幸庠再拜

後湖先生以清江曲見賞於坡公今觀此書帖蓋有得

於東坡者東坡嘗謂延州來季子張子房皆不死嶺南之人亦言東坡不死後湖真不死矣德友久從之游恬於仕進其文氣老而益健有以也夫乾道戊子冬至後二日莆田陳稚書

後湖先生與吾家契好最舊僕晚生不及見之也先生臨終之歲爲叔父中黃翁語羅浮異事知其超然京牕不隨化俱盡矣今德友顧尙刻舟求劍何耶然德友負其所養不少見於世獨置力於斯文真能不負所知哉乾道丙戌除日借觀於上饒祥符僧舍眉山蘇嶠題

李文定被詔帖

公名綱字伯紀居無錫登政和二年進士靖康建炎間以一身之用舍爲社稷生民安危使得畢力殫慮莫或撓之靖康何至於北行建炎豈至於偏安哉公官終尚書右僕射紹興九年安撫荆湖力辭得請次年薨贈少師謚文定此帖紙本高一尺一寸闊一尺六寸行書十三行忠誠之氣溢於毫楮

綱再拜近被御筆詔書以向條具邊防利害特加見諭上恩隆厚何以克當孤危之迹去國十年間關險阻無所不至拳拳孤忠今乃見察第深感泣今錄詔書升謝表劄子去恐不知也綱衰病日加不復堪爲世用然靜而謀之則有暇矣近於所寓僧舍之側葺小圃蒔花種藥爲經行游息之具戲作上梁文及園中十二詠輒以拜呈如得妙句

大觀錄卷七

爲林下之光幸甚幸甚綱再拜

王怡寄軒

胡文定奉問帖

公名安國字康侯崇安人紹聖中廷試擢第三公自
登第迄謝事四十年在官實歷不及六年靖康中爲
耿南仲所擠紹興中爲呂頤浩所斥五年以經筵舊
勞除侍讀而陳公輔等承望風旨交章論詆出知永
州辭尋進寶文閣直學士卒年六十五諡文定此札
白研花箋高七寸七分闊一尺一寸四分行書八行
安國頓首稍疎奉問但企仰不忘爾辱教伏承尊履之休
良用感尉郡久缺兩方得少雨不審治下何如劭農之仁
所留意者故以奉問也安國此摘自如未有占對之日幸
爲人自重不宜安國再拜

伯高太博尊兄閣下

大觀錄卷七

三怡寄軒

趙忠簡辭郡帖

公名鼎字元鎮聞喜人崇寧五年進士中興賢相公
爲稱首見忌秦檜斥逐遠徙紹興十七年在吉陽軍
貶所不食而死自書銘旌云身騎箕尾歸天上氣作
山河壯本朝天下聞而悲之孝宗謚忠簡封豐國公
所著有得全集此札紙本高九寸六分闊一尺四寸
五行行楷十二行正檜惡公逼己徙外時也

鼎以罪名至重不敢復當郡寄尋具奏陳未賜俞允區區
之私不免再陳悃悃伏望鈞慈曲垂贊助俾遂所請實荷
終始之賜鼎方在罪籍不敢時以書至行闕併幸憐察右
謹具呈伏候鈞旨八月日特進知泉州軍州事趙鼎劄子

張忠獻遠辱帖

公名浚字德遠綿竹人中進士第靖康北狩邦昌僭
立逃入太學建炎南渡平苗傅之亂紹興以後攘勁
敵降劇盜能使將帥用命雖屢被人言再奮再蹟然
憂國奉身忠赤如一乾道中致仕薨顙危猶手書以
不能恢復爲憾計聞孝宗震悼贈太師謚忠獻有奏
議文集行世此紙高一尺闊尺四寸餘行書十二行
浚再啓遠辱手翰良佩勤厚治郡無補巧祠蒙允荷上厚
恩錫以異數方且牢辭未知所報行李已出城謀爲湖湘
寓居之計筆脯爲况慰慰感益遠會集唯祈加衛浚再
啓

大觀錄卷七

三怡寄軒

呂忠穆台眷帖

公名頤浩字元直齊州人中進士第公有膽略善鞍馬刀劍苗傅之亂倡義勤王投鞭誓衆士氣感厲高宗復辟拜中書平章事艱難之際倚以爲重然創大軍月椿錢遺東南之困不能容李趙二公同心恢復清議以是少之紹興八年卒封秦國公謚忠穆此札淡紅花箋高八寸闊一尺三寸餘行書九行

頤浩再拜台眷均福承奉郎權富陽縣徐端義乃舊同官之弟前爲富陽丞諸司嘗奏乞知本縣會諸使屢更易辟不成邑人頗安之幸爲檢會案牘再爲奏乞庶惠及百里也頤浩再拜

韓蘄王總領帖

公名世忠字良臣延安人公起應募百戰立中興功
刀痕箭瘢如刻畫紹興中秦檜收三大將權拜公樞
密使抗疏論其誤國復乞骸骨得允杜門謝客時跨驢
攜酒縱遊西湖自號清涼居士二十一年薨孝宗追
封蘄王謚忠武此札紙本高九寸三分闊一尺餘行
書十一行正公解兵柄歸朝時也

世忠咨目再拜啓總領少卿台坐近專遣人上狀諒已得
達聽瑩秋暑尚煩伏惟神相公忠台候萬福世忠忠濫叨政
輔無補於朝尚阻良晤切冀仰副眷倚以時珍厚謹上狀
不宣世忠咨目再拜啓
總領少卿台坐

又運使帖

世忠咨目頓首啓運使直閣侍史近聞言誼良勤懷向比
辰春雨伏惟漕輓餘閒台候曼福少懇近得旨以本司官
兵二月下旬以後券食錢米有准擬權於貴司兌撥應副
已有公文奉聞今去支期不遠敢煩順旨速爲兌撥錢三
十萬貫告爲嚴戒所屬星夜起發得二月中旬內到軍前
以濟急闕俟朝廷降到錢即便發還也千萬千萬悚仄未
閒自愛不宣世忠咨目頓首啓

運使直閣侍史

沈忠敏高秋帖

公名與求字必先德清人政和五年進士高宗朝歷御史三院知無不言前後四百奏語皆切直紹興四年拜參知政事贊上親征書車攻詩以賜五年兼知樞密院尋出知明州七年車駕幸平江召見從至建康仍知院事薨諡忠敏此札白紙本高九寸七分闊一尺一寸四分行書八行

與求頓首上子明知府侍郎親家台席高秋氣爽伏惟台候勝常與求屏居里社未有晤集之期千萬爲國保重不宣與求頓首上子明知府侍郎親家台席

翟參政宣撫帖

汝文字公異丹陽人登進士第徽宗時諫阻東封貶
外久之除中書舍人以曾與蘇黃游罷知襄州尋召
還職外制典雅一時稱之紹興初擢參知政事與秦
檜同處政地然性剛不爲檜屈至對案相詬罷去卒
風度翹楚精於篆籀尤善行草此札紙本高一尺有
咫闊一尺二寸六分行楷十行

汝文頓首再拜宣撫觀文僕射相公鈞坐去違左右有年
數矣昨者流寓閩粵適大旆亦戾止汝文遲暮之餘挂冠
謝事杜門自屏不復出謁以故無緣詣賓次竊意門下車
轍以千數豈一老庸來去爲多少也謹因使還附承起居
謹狀汝文頓首再拜

宣撫觀文僕射相公鈞坐

陳參知水仙帖

公名與義字去非洛人政和三年甲科擢符寶郎尋
貶高宗南渡召赴行在累拜參知政事紹興八年卒
年四十九長於詩嘗賦墨梅爲祐陵嘉賞世稱簡齋
此札粉箋高九寸四分闊一尺二寸餘行書六行

詠水仙花詩呈章光和與義上

仙人綰色裘縞衣以裼之青悅紛委地獨立東風時吹香
洞庭暖弄影清晝遲萬里北渚雲亭亭竟何思唯應園中
客能賦會真詩

張章簡授封帖

公名綱字彥正丹陽人徽宗朝五中首選除校書郎
論事與蔡京不合爲所擠久之還職廷遣童貫蔡攸
出師抗論不可累遷待制秦檜柄國臥家二十年檜
死召起尋參知政事懲檜苛政摘剝民八十事宣布
中外昭知聖德孝宗時卒年八十四謚章簡此札紙
本高九寸六分闊一尺二寸行楷十三行

綱比以小兒堅乞回授封號事上千鈞聽方懼冒浼乃蒙
特爲開陳俯從所請非參政留念之力何以得此舉室榮
感不可言堅以宮祠任滿束裝造朝已令申乞呼召面列
謝悃儻辱與進略賜提耳之誨使晚學小生得所矜式幸
甚幸甚右謹具呈

資政殿學士左大中大夫 致仕張綱劄子

張文忠宮祠帖

公名九成字子韶開封人紹興二年進士對策擢首
選更大臣薦累官刑部侍郎大辟成案多所平反金
人講和公持議不可秦檜惡之尋以謗訕謫南安軍
居十四年每執書就明倚立庭磚雙趺隱然檜死起
知溫州丐祠歸卒謚文忠此帖牙色紙高九寸闊一
尺四十行草九行

九成再拜聞宮祠已滿且復有瘡瘍之苦計今已安平三
八哥得書四一哥遂有一男子可喜可喜想見其室中亦
自此無事矣諸令弟讀書不輟尤用慰懌范蘭止以武舉
得官不聞其能文也去歲能賦者乃向來對門居程遜耳
范亦可往來一見自知其人矣九成再拜

洪文安睽遠帖

公名遵字景嚴忠宣仲子中博學宏詞科父竄死嶺外免喪召對極陳父冤拜起居舍人輯邇英記注累遷翰林學士出知平江有德於吳孝宗朝拜同知樞密院事尋丐去出知太平建康詔褒治績淳熙元年提舉洞霄宮卒年五十五謚文安此札紙本高一尺餘闊一尺五寸行楷書九行

遵頓首再拜睽遠許時可量向仰之悰里居屏蹤不值端便只尺之間無從而前專使伏枉教賜累楮紙周諄尉無已涇川胝章旣久緬計實惠敷施彼民何幸來諭迺欲奉祠何耶未卽再晤崇練哀對新渥至扣遵頓首再拜

朱鴻臚別後帖

敦儒字希真河南人志行高潔雖爲布衣而有朝野之望靖康中召至京師固辭還山高宗立屢詔敦遣故人勸之始幡然起賜進士出身除祕書省正字兼兵部郎以人言請歸希真工詩及樂府婉麗清暢秦檜當國擢鴻臚卿論者咎其晚節不終云此札白紙木高九寸闊一尺二寸餘行書十一行

敦儒再拜別後塵勞都不果寓書亦寂不蒙寄聲弟勤尙想比日想諸况安適向者李西臺書久塵文府乞付示久不見此書日夜夢想告密封付此兵回也必不以煎迫爲罪愧悚愧悚偶作書多不能觀縷何日得相從於黃岡懷玉間臨書神馳敦儒再拜

葉丞相初冬帖

衡字夢錫金華人紹興十八年進士第知於潛縣治
爲諸邑最擢知常州府救饑療疫活民甚衆任樞密
都承旨理兵事最悉俄拜右丞相訕上語聞謫郴州
安置尋復官與祠卒年六十二史論其由小官不十
年至宰相進用之驟雖才智有餘實出曾觀云此札
紙本高闊各九寸行書八行

衡悚息啓縣尉奉議卽日初冬薄寒伏惟警捕有相履用
多福未緣晤見切冀惠令節宣倚須超擢不宣衡悚息啓
縣尉奉議侍史

汪尚書子東帖

公名應辰字聖錫玉山人紹興五年進士第一忤秦檜斥嶺嶠寓居常山蕭然一室檜死始還朝孝宗受禪凡大典禮皆公裁定官至吏部尚書兼翰林學士立朝多革弊事中貴側目出知平江被譖貶秩臥家不起淳熙三年卒此札紙本高九寸闊一尺一寸行書計九行

應辰頓首再拜被□□審早上起居住佳安小保詳納去期集明日未能辦須再展昨見許公執云須待中庸畢工方可期集及見梁師乃云中庸畢工當在後月初間局中錢物不足決不可候其期容面稟丞相理會却相聞也不宣應辰頓首再拜

子東學士丈

張學士關徹帖

孝祥字安國烏江人紹興中進士第一仕終顯謨閣直學士卒年三十八年少才敏精於吏治爲文章俊逸過人尤工翰墨嘗親書奏劄爲高宗嘉賞此札紙本高一尺餘闊一尺五寸五分行書十一行

孝祥拜覆適一再具書當既關徹卽日恭惟尊候萬福孝祥少懇趙不疚□尉旣出門下極深感激聞以未獲刼賊差人督捕此固當然但閱日已久賊終未可盡獲欲告且與追還使臣者渠當日夜究心期於必獲也僭易皇恐之極謹拜覆不備孝祥拜覆

姨夫判官留守待制侍郎台坐

吳信州札

傅朋知信州日陞辭高宗謂九里松額朕屢書終不逮卿命尋舊額重懸由是書名益顯此札紙本高九寸闊一尺六寸書十七行宋印三方

說咨目頓首上啓近因便常附問說直孫致達當已塵覽比蒙誤恩徼守便郡方朝廷愼惜名器之日此地與闕俱近而困頓閑冷之人詎應得此往已拜命夙夕滋懼不敢自保非晚攜家往依餘庇預以欣幸未問尙幾順序加護說勒啓不宣說咨目頓首上啓處和麗水大夫賢舊

又敘慰帖

紙本高八寸闊八寸五分行書大八分許

說頓首上啓區區敘慰已具右疏卽日凝凜不審孝履何似末由一造廬次惟冀節抑哀苦以承家世寄託之重不勝至望謹奉啓不宣說頓首上啓

大孝宣教苦次

又誨翰帖

紙本高八寸七分闊一尺二寸行書九行

說頓首再拜昨晚特枉誨翰適赴食歸已暮不卽裁報皇恐皇恐閱夕不勝何似寵迷佩眷意之渥豈勝銘戢區區併遲瞻敘適在他舍修致率略幸察不宣說頓首再拜

御史觀察尊親侍史

又戒牛帖

紙本高八寸七分闊一尺四闊餘計行書十六行

說皇恐再拜上覆前日匆匆請違門下有二事失於面稟
殺牛之戒先輩爲政急先務况法禁甚嚴所當遵守而浙
東州使府特甚不但邨落彌滿雖府城通衢亦皆畧塞欲
乞大書板榜揭示禁賞罪名仍鑊板管下諸邑散印徧及
鄉村不唯可以奉法兼陰德不淺說有二親戚列在部局
敢以爲獻陳乃表甥向乃妻弟非敢私請實爲公舉說近
經由永康縣似聞樓樞府使臣及宣兵等請受止是邑中
逐旋那移不以時得若非府使稍與應副必致鬪事於人
情有所不周亦鈞念所宜卹也但乞行下本縣取會前後
已應副過錢米之數可見本末恃恩憐之深敢盡所聞說
皇恐再拜上覆

又眷聚帖

牙色紙本高九寸闊一尺三寸瘦行書十四行

說拜問門內眷聚伏想長少均協多蒙賢壻以未接識不及別狀孥累輦乘二巨艦轉江入淮甸頗遲遲今猶未至次第經由高沙兒輩若知良臣在彼必往請見大兒子近堂差泰州如臯監鹽偶得見闕便來赴官朝夕先過此相聚數日而後之任仲子調真州推官尙有一年闕叔子嶽祠滿已一年半未得赴部同二季隨骨肉俱來賢嗣昆仲一一均福說再拜

虞忠肅適造帖

公名允文字彬甫隆州人登紹興二十三年進士早
以文學致身臺閣晚際時艱出入將相孜孜忠勤垂
二十年采石之役公以儒臣犒師奮勇督戰轉危爲
安功績尤偉淳熙四年薨謚忠肅所著有詩文集奏
議志書學鍾成侯雖未精詣自合古法此札紙本高
一尺餘闊一尺七寸行書十七行停雲刻石

允文適造見尋辱訪別樂處既久數千里分攜可量此心
愴惻也蜀墨二種久所祕愛春秋纂例武侯將苑二書文
與可石竹圖軸皆蜀善本連二麥光牋鹿角膠霜餅子併
以爲故人壽入夜倉卒微甚有愧幸收其意也來旦發舟
不甚早否爲修名自悶不勝再三之懇右謹具呈九月二
十八日允文劄子

張直閣起舞帖

卽之字溫夫參知政事孝伯之子以父恩授承務郎
歷監當管庫之職引年告老特授直祕閣致仕溫夫
以能書聞天下金源尤寶其翰墨年八十卒此札牙
色研花箋高九寸闊一尺五寸行書十四行

卽之適間伏聞從者來歸喜欲起舞想見太夫人慈顏之
喜可掬也野衣黃冠擁嬾殘煨芋之火不能亟謁已拜墜
染將比南珍行李甫息肩眷軫首及厓劣顧何以稱之敬
須侍謝次令弟賜翰已領卽之拜稟

殿元學士尊親契兄台坐

染物甚佳

又殊祉帖

紙本高八寸闊一尺二寸書九行紙精筆妙

親眷內外均示殊祉小兒率婦孫以下列拜長倩婦有微

贊不敢以寒陋廢禮一笑領略幸甚色絲翠小榷各小掩
併附還禾輕瀆知愧或不能爲復不敢請委目卽之上問
尊堂太安人壽履康寧

又宮使帖

牙色紙高八寸五分闊一尺二寸書十三行

卽之上覆宮使尙書先生台席卽之違去門下忽將兩月
馳情惓惓日夕以之庚伏炎酷共惟燕居優游神物協相
台候動止萬福卽之遠賴輝庇粗爾遣免未卽侍見敢祈
珍育行膺寵異謹奉啓承記曹不宣卽之上覆
宮使尙書先生台席 謹空

范文穆垂誨帖

公名成大字至能吳郡人紹興中進士第隆興初致書北廷幾被殺卒不辱命而還帥廣西制置四川卓有治略召拜參知政事尋帥金陵鋪饑戮盜江境乂安以病請間領洞霄宮紹熙四年薨謚文穆所著有石湖集攬轡錄桂海虞衡志書法道勁在米黃間此札白粉箋高九寸闊一尺六寸行草十六行

成大白蒙垂誨先夫人志欲改定數處卽已如所教一一更竄添入久已寫下草子正以一兩處疑封題在書案數月矣而未敢遣一則今之所增贈典及諸孫及壻官稱姓名等皆是目今事而僕作志乃是吾儕在湖蜀時恐公點檢出來却是一病若不以此爲病則可耳公可更細攷而詳思之若有所疑卽飛介見諭當卽日回報不敢復如前

日之遲徊二則本欲力拙自書而劣體日增倦乏不能如願不知吳興想不乏能書者就令朱書於石尤良便耳揮汗草草率略不罪不罪成大再拜

又荔酥帖

紙本高九寸四分闊一尺二寸五分計行書九行

成大頓首再拜辱寄荔酥沙魚極荷珍記丈母留此數月初止是健忘舊疾入冬來患痢且淋臥牀甚久前月極□
□晝夜憂之城中醫藥比南塘不同目今又難起動百六
百七哥亦在此并其婦看觀觀委爾之狀甚可慮也朝夕
賤迹得去卽方敢津發歸鄉問及故略以拜稟成大再拜

陸待制仲躬帖

公名游字務觀山陰人鎖廳薦送禮部試中俱爲秦
檜所黜檜死始補宣德簿以薦授京秩孝宗初賜進
士出身多所建白尋出倅夔州范文穆帥蜀辟爲參
議以文字交不拘禮法或譏其頽放因號放翁嘉泰
中修國史成升待制卒年八十五此札白紙本高九
寸三分闊一尺六寸行書二十行筆法飄逸

游頓首再拜上啓仲躬侍郎老兄台坐拜違言侍又復累
月馳仰無俄頃忘顧以墅處窮僻距京國不三驛邈如萬
里雖聞號召登用皆不能以時修慶惟有愧耳東人流殍
滿野今距麥秋尙百日奈何如僕輩旣憂餓死又畏剽劫
日夜凜凜而淫雨復未止所謂麥又已墮可憂境中矣朱
元晦出衢婺未還此公寢食在職事但恐儒生素非所講

又錢粟有限事柄不顯亦未可責其必能活此人也游去
臺評歲滿尙兩月廟堂聞亦哀其窮然賦予至薄斗升之
祿亦未知竟何如日望公共政如望歲也無階參省所冀
以時崇護卽慶延登不宜游頓首再拜上啓 正月十六
日

又奏記帖

紙本高九寸七分闊一尺七寸計行書廿一行

游近者奏記方以草率爲愧專使奉馳翰所以勞問甚寵
感激未易名也暫還展省此固龍圖丈襟懷本趣道中春
寒不至衝冒否詔追度不遠旬浹或已被新渥矣下諭舊
貢院已爲中丞蔣文所先新定驛舍見空間或可備憩迫
已令掃灑矣他委悉俟面請游蒙賜香墨皆珍絕足爲蓬
戶之光下情感荷之至他俟續上狀次右除具呈

朝議大夫權知嚴州軍事陸游劄子

范潔一舟帖

潔宋史無傳莫考爵里此二帖一舟白紙春澤黃紙
高八寸四分闊一尺共十行有宋收藏及騎縫印佳
適聞有一舟自北來未入門已遣介催促前來稍堪卽押
往聞頭候使艫之騰移也乞悉州中諸幕各有差朱簽謁
告獨當勘事勞可知也修荅草草幸深照其愚悚悚潔啓
又春澤帖

春澤可喜今有豐年之望也陵事想煩經畫裁費之外必
易應副子細孫兄去可悉談也

王參知薄寒帖

之望字瞻叔穀城人紹興八年登進士秦檜時落落
不合人以爲有守迨參政事惟附湯思退主和割地
地割而敵勢日張之望坐廢乾道六年卒此札紙本
高一尺六分闊一尺五寸行書十五行

之望頓首再拜季思通判學士尊親台坐卽日薄寒伏惟
台候萬福帥司差體量賊事想又一出今必已了可作一
書與李承宣懇渠或恐奏功薄霑賞典也漆器見買近得
十五哥書報浙東早禾大熟秋間亦旱所諭戍兵六月間
作劄子稟廟堂七月間劄下田俟施行李侯已差百人於
桂陽二百人屯郴矣得此想可奠枕也大軍幾時回應辦
亦良勞也未間保重不宣之望頓首再拜

季思通判學士尊親台坐 九嬪以次均休百一哥妹方

大勸錄 卷七

王怡寄軒

進茂老妻兒女比間有妾無外服藥餌須面見方傳

康伯可宮使帖

與之字伯可中州人南渡後以文詞待詔此札牙色
箋高八寸五分闊一尺二寸行書十三行

與之上覆宮使尚書先生台席與之違去門下忽將兩月
馳情拳拳日夕以之庚伏炎酷共惟燕居優游神物協相
台候動止萬福與之遠賴輝庇粗爾遣免未卽侍見敢祈
珍育行膺寵異謹奉啓承記曹不宣與之上覆

宮使尚書先生台席 謹空

大觀錄卷七

王怡寄軒

王丞相上恩帖

淮字季海金華人登紹興十五年進士第爲御史劾
免宰相湯思退等除舍人封駁龍大淵等詔書知制
誥訓詞深厚得代言體歷拜左右丞相提舉洞霄宮
淳熙十六年卒謚文定獨以不喜朱紫陽興僞學之
禁毒痛善類爲士林切齒云此帖紙本高九寸闊一
尺二寸行書九行

淮竢罪機廷每慚無補上恩過厚延寘政塗懇免莫從夙
夜震懼曲承雅眷首遺慶緘感服之私非筆舌所能旣尙
幸台照 右謹具呈中大夫參知政事王淮劄子

朱文公賜書帖

公名熹字元晦婺源人紹興十八年進士仕終寶文閣待制提舉鴻慶宮慶元五年卒年七十一公登第五十年仕於外者僅九考立朝纔四十日學禁方嚴士或更名他師狎游市井自別非黨公猶講論不休有勸謝遣生徒者笑而不荅寶慶中封徽國公謚曰文此札白紙高八寸二分闊一尺餘行書十行

熹昨蒙賜書感慰之劇偶有小職事當至餘姚歸塗專得請見人還撥冗布稟草草餘容面既 右謹具呈

提舉中大契丈台坐 六月 日宣教郎直祕閣提舉兩浙東路常平茶鹽公事朱熹劄子

又教授帖

黃紙本高一尺闊一尺五寸行草十七行

正月卅日熹頓首再拜教授學士契兄稍不奉問嚮往良
深比日春和恭惟講畫多餘尊履萬福熹衰晚多難去臘
忽有季婦之戚悲痛不可堪長沙新命力不能堪懇免未
俞比日再上計必得之也得黃壻書聞學中規繩整治深
慰鄙懷若更有以開導勸勉之使知窮理修身之學庶不
枉費鈐鍵也向者經由坐間陳才卿覲者登第而歸近方
相訪云頃承語及吳察判夫婦葬事慨然興念欲有以助
其役此義事也今欲便與區處專人奉叩不審盛意如何
幸卽報之也因其便行草草布此薄冗不暇他及正遠唯
冀以時自愛前需異擢上狀不宣熹頓首再拜

韓尚書晴寒帖

元吉字无咎紹興中進士第歷令牧郡守轉運使表
率端莊篤意學校所在吏民懷思嘗以大臣論薦與
紫陽先生同被召積官至吏部尚書卒此札牙箋高
九寸闊如之方幅行書八行

元吉頓首上覆伏奉手教欣審晴寒台候萬福朋樽竹萌
拜貺珍感但顛倒置愧甚節中可見臨少飲否書匣偶無
之尋卽爲人覓去也他須面罄匆匆不宣元吉頓首上覆
司馬朝議二兄台坐

楊文節清和帖

公名萬里字廷秀吉水人紹興中進士官至寶謨閣學士開禧二年卒年八十三孝宗始欲大用以疏詆呂頤浩配享上不悅由是出外光宗立召還尋侂冑柄國十五年臥家不起已而聞侂冑用兵事呼憤慟哭而逝謚文節光宗嘗賜誠齋二字學者稱誠齋先生云此札白箋高一尺闊一尺一寸餘行草十四行萬里伏以首夏清和恭惟達孝宮使判府中大新拜祝釐高蹈事外天相台候動止萬福萬里素餐有箸亡補縣官未以罪乃庇焉所逮知感知幸尙遙良覲致幾盡珍愛理卽膺予環之寵右謹具呈四月廿四日朝請郎守尙書左司郎中兼太子侍讀楊萬里劄子

王忠文寵示帖

公名十朋字龜齡樂清人秦檜死上親策士擢第一
除侍御史歷陳恢復大計拜吏部侍郎尋知饒州久
旱入境雨移知湖州積霖入境霽民所在繪像以祠
及去老稚涕泣攀留思之如父母疾革以龍圖閣學
士致仕卒年六十謚忠文其讀書之室扁曰不欺此
札紙本高九寸七分闊二尺一寸行書二十九行

十朋伏蒙寵示室銘題跋并和詩三復欽嘆詩詞意俱工
但過情之譽非所敢當耳銘跋高深微妙然有所未喻者
不欺二字豈晚學無力量之人所敢擬議以是名室自知
得罪竊效古人坐右銘聊以自警云耳張丞相以合天人
爲不欺深得中庸謹獨論語一貫之旨其說非不廣大其
爲訓戒也亦深且至矣而高見以爲未廣如是則吾夫子

所謂惟天爲大吾誰欺欺天乎之語亦未廣耶近世學者多流入於異端反以吾聖人之道爲小又以天爲小而求其所謂大於虛無荒唐清淨寂滅不驗無實之間是之所爲大者非欺而何不謂賢者過之而亦爲是說也大是饒舌及神游毗耶離城稽首丈室等語雖出於戲翰弄墨然先聖賢所不道六經所不載恐非先生長者爲後學之訓未敢承教金華子之學亦雜於佛老至其讀和韓詩有想見大顛師不應談濯磨之句識者偉之聖道不明久矣諸儒不能無罪因高論雄文之及輒敢布其狂言十朋惶恐右謹具呈左奉議郎充集英殿修撰權發遣饒州軍州事王十朋劄子

徐祕閣安國帖

公名夢莘字商老臨江人紹興中舉進士官終直祕閣恬於榮進著三朝北盟會編起政和七年訖紹興三十一年共三百五十卷開禧初卒年八十二此札紙本高八寸六分闊一尺三寸行書十二行

莘頓首區區久不上訊企想不勝比日遞中蒙問伏審公暇履用安裕數日前得敕合部尙未知各在舊治所還會於北都矣子正已自申陳恐已得明文及其他處置行遣並乞示諭但恐靡舍不足當煩爲慮久此孤陋再獲款炙喜可知也未間切冀保重不宜莘啓上

安國贊善閣下 廿日新樂縣鐙下

謝中丞傾耳帖

公名諤字昌國新喻人紹興末進士第爲吉州錄事
饑民萬餘求廩公植五色旗分糶頃刻譁定擢御史
奏減月椿錢甦東南困遷右諫議大夫上論皆政要
光宗立拜御史中丞尋請祠卒年七十四學者稱艮
齋先生書法東坡窘於舒放稍變其體此札紙本高
八寸五分闊一尺四寸計行書十三行

諤昨日承垂訪傾耳剴切之談執事如有遇其魏鄭公陸
宣公之流亞乎更冀日究時用不患無特達之知也拙句
漫資一笑區區尙容面詳右謹具呈

益夫宣教舊友 三月 日朝散郎試右諫議大夫謝諤

劄子

蔣待制沖寂觀詩帖

璨字宣卿陽羨人樞密之奇猶子也紹興中官戶部侍郎敷文閣待制考宋史無傳行誼靡得而詳焉此帖紙本高八寸六分闊二尺七言律二首綴一長跋行書計十九行

兔井橋邊鷓首橫過逢仍怯近鄉情路人失喜交頭語鄰犬何知掉尾迎重到雲房驚落莫直須金闕早崇成百年香火追先志始信吾宗世濟榮

慣見琳宮全盛時竭來荒梗倍傷悽虛堂不復瞻遺跡先考通奉書壁在八蔣院今不復存敗壁纔容覓舊題伯考樞密太師題三史院僅留數字帝傳前修皆矩矱雲孫後裔合攀躋興衰補敝應商略徙倚修廊日欲西

沖寂觀去南莊數里肇建於有唐逮今數百年中間衰敝

吾家曾祖太傅公爲司出納且主盟興起之相繼累世不
墜兵火之後殿宇久廢弗理房舍荒寂璨今再至不勝感
嘆故作二詩紹興甲子季秋乙亥蔣璨拜呈

喬文惠恐勤帖

公名行簡字壽朋東陽人紹興四年登進士歷官平章軍國重事封魯國公弘深好賢論事通練淳祐元年薨年八十六謚文惠所著有凡山文集此札紙本高九寸五分闊一尺三寸行書十二行

行簡恐勤染報不敢觀縷少意拜稟女夫王太社儀今亡矣有少田土乃典物爲人昏賴事已結斷乃復興訟據其幹人小人之姦詐欺孤如此望爲詳酌而分明之小女亦不存無人照管仍乞免追其幹人是幸瑣細干括愧甚切幾台照右謹具呈十一月日少傅平章軍國重事益國公喬行簡劄子

杜子卿勤顧帖

良臣字子卿書法精妙尤以小篆見稱於時此札研
花黃箋高七寸四分闊一尺七寸行書十三行

良臣連日荷勤顧老親昨日暑中令閣嬾嬾仍勞遠出尤
感尤感專介至詢問醫者蓋猶未至也媽媽今日却已不
甚熱然不敢投藥且吃粥糜今日且不勞見過候柴醫却
相聞同商議投藥欲得中興登科記最後一冊檢朝貴家
諱發劄子幸卽檢付去僕一示餘容面對以究草草希友
亮良臣啓 仲一哥新恩內除賢弟

樓宣獻兩潤帖

公名鑰字大防隆興元年進士累擢起居郎兼中書舍人繼奏無所迴避韓侂冑喋之奪職侂冑誅起爲翰林學士時年過七十精敏絕人詞頭下立進草院吏驚詫進位兩府者五年求去嘉定六年薨諡宣獻自號攻媿主人有文集一百二十卷此札紙本高一尺闊一尺六寸六分行書十九行

鑰泣血再拜上啓叔清宣教親契兄坐前梅天兩潤伏惟聖室有相孝履支福鑰區區哀訴之悃已列前牘不復重陳母氏之喪比者蒙頒奠之渥且勤臨慰偶以負土山間不及號訴歸見弟輩言之方欲尋便修謝忽又被專書心慰心感增益不敏之媿况門下遭艱無由一拜總惟乃荷周綴如此尤見崇篤之誼鑰老矣去歲積病之餘繼以大

禍去死一髮苟延視息以圖大事已卜臘八舉葬得了此
段則此身必不久於世遂將相尋於九京不敢自期於再
見憑紙悲哽惟冀節宣以時前迓亨肅抉力不次鑰泣血
再拜上啓 叔清宣教親契兄坐前

曾開府再拜帖

觀字純甫汴人與龍大淵俱孝宗潛邸舊人大淵死與王抃甘昇相蟠結文武要職俱出其門用事二十年權震中外譖逐大臣貶死嶺外朝士側目帝始覺其姦稍疎遜觀憂患疽發於背侍宴翠寒堂退爲記以進未幾卒仕終開府儀同三司此札粉箋本高一尺闊九寸二分行書十行

觀再拜平江酒監毛汝能乃觀所辟置天下之奇材而德廣諸人不以法度御之多取以供他費小使臣不敢輒忤其意至今循習不改觀已請於朝欲自使令今已得數萬緡酒本方營求數十區屋林興治清和一坊追復其舊稍待一兩月之期使司必與享此利欲望一差檄過杭嚴戒以卽日上道幸甚第勿令胡守知此意也觀再拜

龍觀察歲華帖

大淵與曾覲同爲建王內知客孝宗受禪除樞密副都承旨尋知閣門事觴詠唱酬帝字呼而不名後以語泄出爲浙東總管中外快之乾道四年死此札紙本高一尺闊一尺三寸行書十二行

大淵竊以歲華將暮寒威益凜伏惟戎政多暇神介靖共台候動止萬福大淵卽有承顏接詞之便預增欣躍謹再奉手納上詞興居兼謝來貺右謹具呈十二月 日
昭慶軍承宣使知閣門事兩淮撫諭龍大淵劄子

吳少師觀李氏譜牒帖

琚字居父憲聖皇后姪工書畫書類老米以詞翰被
遇孝宗位至少師判建康府卒初孝宗崩大臣請后
垂簾冊立寧宗琚言垂簾可暫不可久其恭慎如此
此札紙本高九寸闊一尺四寸行書十二行

杞宋文獻不足而禮無所取證先聖憫之今觀唐李氏譜
牒命誥宛然具有迺知來裔善守其家者如此攬卷爲之
三歎時淳熙歲次丙午中秋後四日書於淮東總餉官舍
延陵吳琚九月廿六日

又焦山題名帖

延陵吳居父解組襄陽汝陰孟子開臨邛常叔度皆一時
秩滿聯舟東下泊紫金山越三日來浮玉觀新建飛仙亭
又三日絕江而南紹興辛亥季秋丙寅題

又壽父帖

白黃麻紙高九寸闊二尺六寸字大一寸內外竟入
米體豪放可觀

比恩恩附書諒亦在下旬可到遞中收十月三日手筆并
詩深以爲慰示喻已悉襄州之行非所憚也不謂以常式
辭免就降改命辭難避事何以自文不知閱古之意如何
今必有定論矣十九日入京西界交割安撫司職事廿日
方得改差劄子已具辭免且在郢州境上伺候回降若省
劄更遲數日則已到襄陽郢去襄只二百餘里江陵亦然
歲晚客裏進退不能勢須等候半月十日方見次第地遠
往返動是許時遠官非便殆此類也旅中鐙下作此言不
盡意餘希加愛不宣 十月廿日瑒上

壽父判寺方簿賢弟

又觀使帖

粉箋本高九寸闊一尺四寸計行書十二行

琚伏自廿二日具稟報之後深慮指揮未到勢不容留遂將牌印牒以次官權管姑作急難給假起發方登舟間忽領珍染寵示省劄如解倒懸感佩特達之意無以云喻卽星夜前邁矣瞻望鈞光在邇茲得以略切句炳照琚皇恐拜覆

觀使開府相公尊兄鈞席

杜清獻判院帖

公名範字成之黃巖人嘉定元年舉進士居下僚具
公輔之望言事多鯁直不避權要知寧國備奏旱暵
荐臻殍死盈道羣盜剽掠疆臣欺蔽帝慰勞之淳祐
中歷拜右丞相策邊禦戎計功行賞軍士歡悅未幾
卒諡清獻所著有古律詩詞雜文奏藁外制諸集甚
富此札計十五行

範惶恐拜柬判院舍人契兄坐前範向辱下訪別來甚久
惟有慕用茲拜珍染示以所注鶴山詩學討論餘功及此
開悟後來者多矣讀之起敬不鄙厚意良用感戢略此奉
復尚祈台照右謹具拜呈 五月 日

朝待行試吏部侍郎兼同修國史實錄院同僚撰兼中書
舍人權禮部尚書兼侍講杜範劄子

魏文靖注釋帖

公名了翁字華父蒲江人慶元五年進士時侂冑謀
開邊舉朝憂駭公試學士院奏策端言之尋侂冑誅
彌遠入相力辭解官授徒白鶴山下差知漢眉瀘諸
州去國十七年始召入對理宗嗣服旋蹶旋起以樞
密院督視荆湖軍馬甫二旬召赴闕嘉熙初改知福
州疾革口授遺表恭手而逝謚文靖賜第蘇州所著
鶴山集經史雜抄師友雅言此帖黃箋本高七寸闊
一尺有宋印一方

了翁不善爲書特不苟作耳注釋六教祗以播惡去冬不
暇詳閱恰兩日間取而觀之則尤見該洽亦有未盡得當
時本意者當爲一批注其下恰葉元老見訪其歸也遂
可附此便拜納跋語併可納上也了翁又啓

陸左相羣玉帖

公名秀夫字君實鹽城人景定初登進士恭宗立以禮部侍郎使軍前請和不就而返尋與張公世傑等立益王於福州時播越海濱庶事疎略公正筭立如治朝帝昶又立衛王公爲左丞相猶日進太學勸講厓山破仗劍驅妻子入海卽抱帝赴海死年四十四此研札花箋高九寸闊一尺四寸行書十二行

秀夫拜覆義山尊兄長坐前秀夫比僭就羣玉府借至英光帖一本久留皇愧專此歸納切幸眎至深居詩帖久欲臨寫數紙而未能敢乞暫假數日常所用副墨之子姓某氏不煩候旨其來將有所委之草草拜字它存侍竟不宣秀夫拜覆 義山尊兄長坐前蠲糲紙就覓一幅欲作籤題干煩皇恐秀夫

長孺三十二年前溫陵舟中與君實甫分懷然有惜別意又明年二月死海上原員之節蓋有所不及君實貌容無絕異於人氣沖語溫所立固如此北固郭元德哀其尺牘若干紙爲四卷今其家無有遺孤故人念之至如此元德之視榮附瘁捐者有間哉長孺題

士大夫預人國家事當以節義功名爲本徒以區區翰墨傳後抑末矣余曩在餘英沈則正處見洛水李清卿一帖清江羅壽可處見文山文宋瑞一帖今於京口郭元德處見此帖真成二絕忠烈之氣奕奕浮動紙上百世之下使人感憤錢塘仇遠頓首敬書